

# Olimpia basegna in zichel dapli temp

Il dossier da la candidatura grischuna vegn surdà pli tard a la regenza grischuna

■ (anr/ac) Per ils promoturs per la candidatura olimpica grischuna da l'onn 2026 èsi anc memia baud da surdar il dossier da la candidatura a la regenza grischuna. L'equipa da project vul anc sclerir ulteriuras dumondas pertutgant ils lieus d'occurrentza e spetgar sin ils resultats dals discurs tranter la regenza grischuna e las autoritads dal chantun Turitg. Atgnamain

ha l'equipa da project dals gieus olimpics per l'onn 2026, instradada da las organizaziuns tetgalas da l'economia grischuna, previs da surdar il dossier a la regenza grischuna la fin da zercladur 2016. Sco quai che Urs Schädler, president da la Uniun grischuna d'artisanadi e mastergn, ha explitgà sin dumonda è l'equipa da project vegnida a la conclusiun ch'i saja anc memia baud da surdar il dossier. Schädler ha fatg attent ch'il dossier sco tal saja bain elavurà. El ha dentant plidentà ils proxims discurs tranter la regenza grischuna e las autoritads dal chantun e da la citad da Turitg. Vinavant saja Swiss Olympic londervi dad examinar las ulteriuras candidaturas svizras per il gieus olimpics d'enviern da l'onn 2026. Per evitar critica ch'il dossier grischun na saja betg cumplet sajan ils protagonistes da la candidatura grischuna sa decidids da spetgar quellas proximas evaluaziuns. Quai per schar flessegjar ils resultats tant dals discurs tranter il Grischun e Turitg sco las enconuschientschas da Swiss Olympic en il dossier da la candidatura grischuna. Sco quai che l'equipa da project da la candidatura grischuna, timunada dad

Andreas Wieland, scriva en ina communicaziun vulan ellas surdar il dossier a la regenza grischuna en il decurs da la stad 2016. La regenza vegn ad examinar il dossier e prender posiziun en chaussa. Ier passada è l'equipa da project sa scuntrada cun il cusseglier guvernativ, Jon Dome-

nic Parolini, per infurmar il minister da l'economia grischuna davart il stan actual da la candidatura grischuna. Ina candidatura che sa basa sin ils lieus d'occurrentza da Tavau, Arosa, Flem/Laax, Lai, San Murezzan e Cuira. Sco quai ch'ils protagonistes da la candidatura grischuna

scrivan èn ils contacts cun quels lieus bain instradads. Intginas dumondas davart ils lieus d'occurrentza vul l'equipa da project tuttina anc sclerir pli detagliadament. Ils promoturs da la candidatura grischuna scrivan dad in agir sin plirs binaris ed els vulan, malgrà il stretg spazi

da temp, pussibilitar e promover ina fundada discussiun politica.

## Olimpiada cumbinada cun campagna da digitalisar

Ils promoturs per ils gieus olimpics en il chantun Grischun vulan cumbinar la realisaziun dals gieus cun ina offensiva da digitalisar il chantun per uschia pudair far diever da la pli nova tecnologia da comunicar. Els scrivan dad ina offensiva digitala en connex cun la candidatura grischuna. Il president da la Uniun grischuna d'artisanadi e mastergn, Urs Schädler, ha bain concedì ch'i sa tractia dad in effect lateral da la candidatura grischuna. El è dentant persuadi ch'i sa tractia dad ina impurtanta chaussa che lubeschia da colliar il center urban da Turitg cun la regiun periferica grischuna. La realisaziun dals gieus olimpics duess, tenor Schädler, garantir las investiziuns necessarias en quella digitalisaziun. Investiziuns che fissian probablamain strusch realisablas senza ils gieus olimpics. Per la regenza grischuna na para il retard dal dossier betg dad esser in problem, sco quai ch'il cusseglier guvernativ, Jon Domenic Parolini, ha ditg vers RTR. El ha explitgà che la regenza grischuna stoppia inoltrar la candidatura definitiva fin ils 15 da december 2016. Uschia restia anc temp avunda per elavurar la missiva per ils gieus olimpics. Sco quai che Parolini ha fatg attent vegnia er il cussegl grond a sa fatschentar cun la candidatura grischuna e cun la missiva e quai a chaschun da la sessiun dal favrer 2017.



Ils promoturs dals gieus olimpics 2026 en il chantun Grischun dovran anc in zichel dapli temp per elavurar il dossier definitiv.

MAD